

聖般若波羅蜜多月藏大乘經

傳統佛經文體版

【爐香讚】

爐香乍爇 法界蒙薰 諸佛海會 悉遙聞  
隨處結祥雲 誠意方殷  
諸佛現全身 南無香雲蓋菩薩摩訶薩（三稱）

【三皈依】

南無皈依佛 皈依法 皈依僧（三稱）

【發菩提心】

我今發心 不為自求 人天福報 聲聞緣覺 乃至權乘 諸位菩薩  
唯依最上乘 發菩提心 願與法界眾生 一時同得 阿耨多羅三藐  
三菩提

【四弘誓願】

眾生無邊誓願度 煩惱無盡誓願斷

法門無量誓願學 佛道無上誓願成

【歸命本師】

南無本師釋迦牟尼佛（三稱）

【開經偈】

無上甚深微妙法 百千萬劫難遭遇

我今見聞得受持 願解如來真實義

聖般若波羅蜜多月藏大乘經

頂禮一切佛菩薩。

如是我聞：一時，世尊在王舍城靈鷲山，與無量無數比丘僧及菩薩眾俱。

爾時，月藏菩薩摩訶薩於會中，從座而起，白世尊言：「世尊！諸菩薩應云何學般若波羅蜜多？」世尊曰：「月藏！一切法離實有，即般若波羅蜜多。譬如月輪，無有分別，遶行四洲，盡除黑暗，如是菩薩摩訶薩行般若波羅蜜多，雖無分別，然以悲心周覆四倒眾生，自然能除一切煩惱，此亦以無分別故。」

月藏白曰：「世尊！菩薩之般若波羅蜜多有幾何？」世尊告曰：「善男子！菩薩之般若波羅蜜多有二，謂：有漏、無漏。善男子！此中有漏般若者，謂於信解行地位，有能、所二取分別，能斷彼者，是為有漏般若波羅蜜多。善男子！此中無漏般若波羅蜜多者，謂見道之無分別智，以此智離諸分別而無分別故。善男子！此亦般若波羅蜜多，於彼邊際，或此邊際，俱無所住故。當知般若者，從色乃至一切種智無自性故，般若波羅蜜多無自性；當知色等諸法，於三時不可得，無縛無解。

善男子！一切法平等故，般若波羅蜜多亦平等；

一切法不滅故，般若波羅蜜多亦不滅；

一切法無相故，般若波羅蜜多亦無相；

一切法不生故，般若波羅蜜多亦不生；

一切法不斷故，般若波羅蜜多亦不斷；

一切法不來故，般若波羅蜜多亦不來；

一切法不去故，般若波羅蜜多亦不去；

一切法不常故，般若波羅蜜多亦不常；

一切法不異故，般若波羅蜜多亦不異；

一切法一義故，般若波羅蜜多亦一義；

一切法無實有性故，般若波羅蜜多亦無實有性。

以要言之，一切皆超相狀、自性、體性故，是為般若波羅蜜多。是故般若波羅蜜多咒，即：  
怛經陀·唵·般若爾·般若爾·摩訶般若爾·  
旃陀羅般若爾·薩嚩賒些袞唎·莎訶。

(tadyathā om prajñe prajñe mahāprajñe candraprajñe sarvasāsakari svāhā.)

諸法從因生，此即世俗諦。無性無戲論，勝義所行境。

世尊說是語已，月藏菩薩及一切眷屬、天、人、阿修羅、乾闥婆等世間大眾皆大歡喜，於世尊所說，稱揚讚歎。

聖般若波羅蜜多月藏大乘經。

【七佛滅罪真言】（三遍）

離婆離婆地 求訶求訶帝 陀羅尼帝 尼訶囉帝 毗黎你帝 摩訶  
伽帝 真陵乾帝 娑婆訶

【補闕真言】（三遍）

南無喝囉怛那哆囉夜耶 佉囉佉囉 俱住俱住 摩囉摩囉 虎囉  
吽 賀賀 蘇怛拏吽 潑抹拏 娑婆訶

【三皈依】

自皈依佛 當願眾生 體解大道 發無上心（問訊）

自皈依法 當願眾生 深入經藏 智慧如海（問訊）

自皈依僧 當願眾生 統領大眾 一切無礙（問訊）

【迴向文】



(一)

願以此功德 普及於一切 我等與眾生 皆共成佛道

(二)

願以此功德 莊嚴佛淨土 上報四重恩 下濟三途苦

若有見聞者 悉發菩提心 盡此一報身 同生極樂國

(三)

文殊師利勇猛智 普賢慧行亦復然

我今迴向諸善根 隨彼一切常修學

三世諸佛所稱歎 如是最勝諸大願

我今迴向諸善根 為得普賢殊勝行

我此普賢殊勝行 無邊勝福皆迴向

普願沉溺諸眾生 速往無量光佛刹



圓滿法藏·佛典漢譯  
THE KUMARAJIVA PROJECT